



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
ՈՐՈՇՈՒՄ**

-- դեկտեմբերի 2020 թվականի № --- Ա
ք. Երևան

**«ՀԱՅԱՍՏԱՆԻ ԷԼԵԿՏՐԱԿԱՆ ՑԱՆՑԵՐ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ
ԳՈՒՅՔԻ ՆԿԱՏՄԱՄԲ ԻՐԱՎՈՒՆՔԻ ԲԱԺՆԵՄԱՍԻ ՕՏԱՐՄԱՆԸ
ՀԱՄԱՁԱՅՆՈՒԹՅՈՒՆ ՏԱԼՈՒ ՄԱՍԻՆ**

Հաշվի առնելով, որ՝

ա) «Հայաստանի էլեկտրական ցանցեր» փակ բաժնետիրական ընկերությունը (այսուհետ՝ Ընկերություն) 2020 թվականի սեպտեմբերի 17-ի №635-20 և հոկտեմբերի 13-ի №713-20/5695-2020 գրություններով դիմել է Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով) և հայտնել, որ Ընկերության և «Տ-Քնսթրաքշն» փակ բաժնետիրական ընկերության միջև 2017 թվականի նոյեմբերի 11-ին կնքվել է անշարժ գույքի վարձակալության պայմանագիր, որով վերջինիս են հանձնվել Երևան քաղաքի Բագրատունյաց 54/1 հասցեում գտնվող 4,126,6քմ հողատարածքը և 1315,35քմ ընդհանուր մակերեսով շենք-շինությունները: Կնքված պայմանագրի շրջանակում «Տ-Քնսթրաքշն» փակ բաժնետիրական ընկերությունը վարձակալած հողամասի վրա կառուցել է շինություն (այսուհետ՝ Շինություն), որը կողմերի միջև պայմանագրով ձեռք բերված համաձայնության ուժով համարվում է վերջինիս սեփականությունը: Մինչդեռ, Հայաստանի Հանրապետության քաղաքացիական օրենսգրքի 202-րդ և Հայաստանի Հանրապետության հողային օրենսգրքի 5-րդ հոդվածների ուժով՝ Շինության նկատմամբ «Տ-Քնսթրաքշն» փակ բաժնետիրական ընկերության սեփականության իրավունքի գրանցման համար նախապայման է հողամասի համապատասխան մասի նկատմամբ վերջինիս սեփականության իրավունքի գրանցումը: Կողմերի միջև ձեռք է բերվել համաձայնություն՝ «Տ-Քնսթրաքշն» փակ բաժնետիրական ընկերության կողմից կառուցված շինությամբ

ծանրաբեռնված հողամասի նկատմամբ սեփականության իրավունքի 83 տոկոս բաժնեմասը օտարել վերջինիս: Նշված բաժնեմասի օտարման արդյունքում Ընկերությունը կհանդիսանա հողամասի նկատմամբ 17 տոկոս բաժնեմասի սեփականատեր: Շինության նկատմամբ իրավունքի պետական գրանցման արդյունքում Ընկերությունը ձեռք կբերի Շինության համապատասխան բաժնեմասի նկատմամբ սեփականության իրավունք: Շինության նկատմամբ «Տ-Քնսթրաքշն» փակ բաժնետիրական ընկերության և Ընկերության իրավունքները կգրանցվեն հողամասի սեփականության իրավունքում նրանց ունեցած բաժիններին համապատասխանող համամասնությամբ: Ինչպես հետևում է գրությունից՝ հողամասի և Շինության ընդհանուր արժեքը, որպես մեկ ամբողջություն, հավասար է հողամասի շուկայական արժեքի և Շինության նախահաշվային արժեքի հանրագումարին, և հողամասի նկատմամբ կողմերի բաժինները կորոշվեն այն համամասնությամբ, որը համապատասխանում է հողամասի շուկայական արժեքի ու Շինության նախահաշվային արժեքի հանրագումարում այդ արժեքների հանրագումարին: «Տ-Քնսթրաքշն» փակ բաժնետիրական ընկերության կողմից Ընկերությանը վճարման ենթակա գումարը կկազմի 32,831,480 դրամ, նույնքան կկազմի Ընկերության կողմից «Տ-Քնսթրաքշն» փակ բաժնետիրական ընկերությանը վճարվելիք գումարը, այսինքն, տեղի կունենա առաջացած վճարման պարտավորությունների հաշվանց, և կողմերից որևէ մեկը մյուսի նկատմամբ չի ունենա գումար վճարելու պարտավորություն: Նշվածից ելնելով՝ Ընկերությունը խնդրել է համաձայնություն տալ իրեն սեփականության իրավունքով պատկանող՝ Երևան քաղաքի Բագրատունյաց 54/1 հասցեում գտնվող հողատարածքից 0,231766 հա մակերեսով հողամասի նկատմամբ գրանցված իրավունքի՝ 83/100 հարաբերակցությամբ բաժնեմասի նկատմամբ իրավունքը «Տ-Քնսթրաքշն» փակ բաժնետիրական ընկերությանն օտարելու գործարքի (այսուհետ՝ Գործարք) կնքմանը,

բ) Հանձնաժողովը, ղեկավարվելով «Էներգետիկայի մասին» օրենքի 27-րդ հոդվածի 3-րդ կետով, 2020 թվականի հոկտեմբերի 1-ի N°ԳԲ/34.1-Մ2-2/4170-2020 գրությամբ դիմել է Հայաստանի Հանրապետության վարչապետի աշխատակազմ՝ ստանալու Գործարքի վերաբերյալ կառավարության դիրքորոշումը,

գ) Հայաստանի Հանրապետության վարչապետի աշխատակազմի ղեկավարի 2020 թվականի դեկտեմբերի 23-ի N°02/12.8/53543-2020 գրությամբ Հանձնաժողով են ներկայացվել Հայաստանի Հանրապետության տարածքային կառավարման և

ենթակառուցվածքների ու էկոնոմիկայի նախարարությունների, Հայաստանի Հանրապետության ազգային անվտանգության ծառայության, Հայաստանի Հանրապետության անվտանգության խորհրդի քարտուղարի դիրքորոշումները՝ Գործարքի մասով առարկություններ չունենալու վերաբերյալ,

դ) Հանձնաժողովի կողմից գործարքին համաձայնություն տալը, «Էներգետիկայի մասին» օրենքի 27-րդ հոդվածի 3-րդ կետի համաձայն, չի խախտում էներգետիկ համակարգի հուսալիությունը, անվտանգությունը և ներքին շուկայի սպառողների շահերը, չի սպառնում ազգային անվտանգությանն ու պետական շահերին, իսկ անհրաժեշտ փորձ ունեցող անձի վերաբերյալ դրույթը Գործարքի նկատմամբ կիրառելի չէ, և,

հիմք ընդունելով «Էներգետիկայի մասին» օրենքի 27-րդ հոդվածը և Հանձնաժողովի 2019 թվականի փետրվարի 27-ի №39Ն որոշմամբ հաստատված կարգը՝ **Հանձնաժողովը որոշում է.**

1. Համաձայնություն տալ Ընկերությանը պատկանող Երևան քաղաքի Բագրատունյաց 54/1 հասցեում գտնվող հողատարածքից 0,231766 հա մակերեսով հողամասի նկատմամբ գրանցված իրավունքի՝ 83/100 հարաբերակցությամբ բաժնեմասի նկատմամբ իրավունքը «Տ-Քնսթրաքշն» փակ բաժնետիրական ընկերությանն օտարելու գործարքին, պայմանով, որ Գործարքի կնքումից և դրանից բխող իրավունքների, ինչպես նաև Շինության նկատմամբ իրավունքների պետական գրանցումից հետո Ընկերությունը ձեռք կբերի սույն կետում նշված հողամասի վրա «Տ-Քնսթրաքշն» փակ բաժնետիրական ընկերության կողմից կառուցված շինության նկատմամբ հողամասում իր ունեցած բաժնեմասի համամասնությամբ սեփականության իրավունք՝ հողամասի օտարվող բաժնեմասի արժեքին համապատասխան գումարի դիմաց՝ առանց լրացուցիչ գումարային պարտավորությունների:

2. Սահմանել, որ սույն որոշման 1-ին կետում նշված գործարքի կնքման ժամկետը չի կարող գերազանցել սույն որոշումն ուժի մեջ մտնելու պահից վեց ամիսը:

3. Ընկերությանը՝

1) սույն որոշման 1-ին կետով նախատեսված գործարքները կնքելուց հետո երկշաբաթյա ժամկետում Հանձնաժողով ներկայացնել դրա վերաբերյալ բոլոր փաստաթղթերի պատճենները.

2) ընդունել ի գիտություն, որ Ընկերությունն իրավասու է սույն որոշումը բողոքարկել Հանձնաժողով կամ Հայաստանի Հանրապետության վարչական դատարան՝ այն ուժի մեջ մտնելու պահից երկամսյա ժամկետում:

4. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելուն հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

Գ. ԲԱՂԱՄՅԱՆ

ք. Երևան
--- դեկտեմբերի 2020թ.